

祥符县志凡例

——汴梁应录帝纪王侯表，以备入府志，故不赘。

——黄河乃邑之重，其决徙之故，河防专具，至于壬午全城沦没，灾异非常，忠义叠见，故分类纪之。

——风俗北地大都相似，故略述梗概，不俟缕陈。

——役法乃邑之最急，故于田赋之后，详其款而略述其调停之法。

——明万历后，名宦有声者，据所闻各立一传，不知者止列姓里。

——科贡系祥符人入府庠者，及军校入邑庠者，且同里閤皆地方才也，故并书之。

——旧志人物分列款类，颇觉烦碎。今统以世代先后，列名其事，则有治行、武功、醇谨、文章各传具见，乃孝友、忠义、贞烈、隐逸、游寓、方伎、仙释则各分款项，以备一斑。

——论人行事取其重大，如张玉、张辅虽死于战，乃其立功最多，故入武功，而忠义死节亦自见于传中。

——志烈女，凡以死殉夫及守节终身已经旌表者，必书，即未经旌表而节孝著闻者，亦书。至割股一事，其旧志所载，不敢擅删，今悉不载。

——古今名篇旧志有附见各类中者，今加搜采别为艺苑一卷，以便览诵。

——分野主宿图境内黄河图，俱旧志所无，此仰观俯察，占候汛防所开甚巨，故特为补绘。

——旧志各款俱失小序，使观者突然，今皆为增补，不敢曰文，聊以佐前人所不逮云。

——艺苑体裁赋后宜继以诗，今置之卷末非误也，以征诗未就，梓人告急故耳，更正之举端有望于后人。

开封府为纂修志书以备典要事，蒙河南布政使司信牌，顺治十五年三月二十八日，蒙钦差巡抚河南兵部左侍郎兼都察院右副都御史加二级贾□宪牌，前事照得各府州县之有志也，其所纪载，不越提封四境之中，而实能备国史之所水尽，犹大宗之有小宗焉，犹江海之支流、山岳之嶙阜焉，不可废也。中州夙称文献名邦，高贤辈出，其于典故载籍必所素重。昨据该司呈送通省府州县志书仅四十六种，其余各属咸称：兵燹之后，荡然无遗。就其中新经纂刻者，止汝州、永宁数处。此外，皆系胜国旧编，而于近今之事俱付阙如，及今不图，恐世远言湮老成凋谢，后来难欲从事，势必更难拟合通行，亟为修纂。为此牌仰本司官吏，文到即便转行各府州县，凡无志者，速宜网罗旧章、博求稗乘、敦礼耆英、开局裒辑，其有旧志而未载近今之事者，或有虽经翻刻而因陋就简不暗史裁者，亦须多方采集，更延名硕订正，务使缺略咸辑今昔备载，修成先录清稿呈送本部院披览，谅此不朽之垂人人自有同心也，毋得迟违等因到司备行到府，蒙此拟合就行，为此帖仰本县官吏，照帖备蒙宪牌内事理。即察该县无志者，速宜网罗旧章、博求稗乘、敦礼耆英、开局裒辑，其有旧志而未载近今之事者，或有虽经翻刻而因陋就简不暗史裁者，亦须多方采集，更延名硕自正，务使缺略咸辑今昔备载，修成先录清稿具文呈送本部院，并送本司本府披览，谅此不朽之垂人人自有同心也，慎毋迟违，速速须至帖者。

右帖下祥符县准此
顺治十五年四月 日